



10601

滇雲歷年傳卷五

契皇老人倪蛻輯

曾孫慎樞梅岑恭校

起宋太祖乾德三年盡元順帝二十七年

段氏之先爲武威郡人自段儉魏從鳳伽異敗鮮于仲通於西洱河蒙氏擢爲清平官更名忠國六傳而至思平生有異兆爲通海節度使楊于貞忌之思平卜於秀山神祠就其舅爨判自匿于貞索捕甚急乃變姓名爲獵者以一犬自隨至品甸投宿主人有一戟倚於墻旁置生牛草四疊入夜風忽吹戟洞貫其草思平驚異之明旦以犬易戟又得神驥於葉鏡湖

滇雲歷年傳

卷五

一

會善巨守高方素與思平善密遣人招思平思平與其弟思良及軍師董伽羅走就之在路摘野桃食之核膚有文曰青昔思平拆之曰青乃十二月昔乃二十一日也今楊氏政亂吾當以十二月二十一日舉義乎遂至善巨與高氏謀借兵東方黑爨松爨皆助之其三十七部一曰陽城堡部今晉寧州一曰休臘部今河西縣一曰嶠晤部今嶠晤縣唐嶠貌蠻所居後阿剌蠻酋逐嶠貌而有其地一曰強現三部卽後化長官司今開化府一曰王弄部一曰舊處甸部一曰伴溪落恐部今俱長官司一曰鐵容甸部今虧容

長官司一曰官桂思陀部今思陀甸長官司一曰屈
中部今阿迷州一曰師宗部今師宗州一曰落蒙部
今路南州一曰彌沙部一曰邑市部皆落蒙子弟分
治之一曰維摩部今邱北一曰彌勒部今彌勒州一
曰磨彌部今霑益州一曰羅雄部今羅平州一曰納
垢部今馬龍州一曰夜苴部今廢亦佐縣一曰落溫
部今陸涼州以上彌勒等六部即古槃瓠六種也一
曰吉輪部一曰褒惡部今俱彌勒地一曰羅部今羅
次縣一曰仁地部即新丁後訛尋甸今州一曰白鹿
部即富筋賧今楚雄地一曰掌鳩部訛爲石舊今廢

滇雲歷年傳

卷五

二

縣一曰法塊部未詳所在一曰謀統部今鶴慶漾共
川一曰於矢部今武定府一曰維婺部巨遮甸犍獠
諸夷種今和曲州一曰洪農祿券部今爲祿勸州一
曰華竹部又名環州今元謀縣一曰強中部訛陽宗
今廢縣一曰休制部即普札籠城今新興州一曰步
雄部今江川縣一曰羅伽部即步雄所分右諸爨部
會於石城與思平盟誓立碑在曲靖北十五里合衆
十餘萬鼓行而西所向無敵師至洱河尾是夕思平
夢人斬其首又夢玉瓶耳缺又夢鏡破懼不敢進董
伽羅曰三夢皆吉進也公爲大夫夫去首爲天王瓶

去耳爲王鏡中有影如人有敵鏡破則無影無影則無敵矣三夢皆吉進也思平乃決明旦引兵欲渡莫知所從見江尾一婦衣白被瓔而浣者指曰人從我江尾馬從三沙矣爾國名大理從之得濟楊干貞戰不勝率妻子走永昌追至萬箭樹自縊死親屬皆俘晉天福二年十二月二十一日思平自立改國號大理建元文德盡逐楊氏邪臣除苛令以董伽羅爲相國封高氏爲岳侯分治成紀巨橋等地封爨判爲巴甸侯祠秀山神加恩三十七部於是遠近歸心諸夷君長各來貢獻

滇雲歷年傳

卷五

三

蛻按段氏帝於蠻方於是已五傳矣雖不通中國夷狄僭據不可統元故仍以宋朝紀年不可以玉斧之畫而絕之於千百世以後也至段思平舉事有私讐焉有公義焉其始末有可言者以是叙之於此卷之首見段氏傳世二十二歷年三百五十亦非偶然云

宋太祖乾德三年雲南

史三年正月王全斌平蜀欲以兵取滇進滇地圖帝鑒唐之禍以玉斧畫大渡河曰此外非吾有也由是滇雲與中國不通

蛻按大渡河在建昌城北源出吐蕃合金沙入大江

趨東海其所經流在雋昆明之間也

開寶二年段素順立改元明正在位十七年卒私諡應道皇帝子素英嗣

蛻按史例蠻夷書死然蒙氏受爵公朝者亦書卒書薨重國體也至若干法犯義則仍書死以凜王童今段氏竊據乃宋祖宸斷任之故不容等於契丹其死當書卒以比之中朝士大夫庶乎得其中矣他如廟諡年號俱以私字概之

太宗雍熙三年段素英立改元廣明又改明應明聖明德明治

滇雲歷年傳

卷五

四

真宗景德元年段素英勅述傳燈錄開科取士定制以僧道讀儒書者應舉

野史段氏有國亦開科取士雜流并進今始以僧道通儒書者爲制科

大中祥符二年段素英卒在位二十四年私諡昭明皇

帝子素廉嗣

永昌地震

三年段素廉立改元明啟又改乾興

段素廉子阿統不肖廢之而立其姪素隆

乾興元年段素廉卒在位十四年私諡敬明皇帝姪素

隆嗣

天聖元年段素隆立改元明通在位五年

四年段素隆避位爲僧禪於素真後十八年乃卒私諡

秉義皇帝

滇史阿統有子素真幼聰慧祖母憐之素隆居位五年真已能任國事隆乃禪位爲僧去

段素真立改元正治

寶元二年六月段素真卒在位十五年私諡聖德皇帝有子先亡孫素興嗣

康定元年段素興立改元聖明又改天明

滇雲歷年傳

卷五

五

段素興廣營宮室於東京築春登雲津二堤

滇史素興年幼好佚遊廣營宮室於東京築春登雲津二堤分種黃白花其上有遠道金稜縈城銀稜之目每春月挾妓載酒自玉案三泉湖爲九曲流觴男女列坐鬪草簪花以爲樂時有一種花似因歌而開遇舞而動素興愛之命美人盤髻爲飾因名素興花後訛爲素馨

蛻按東京卽今省城蒙段時城亦甚小圍通寺天王

殿東南角有段氏政德年碑云寺在城之北二里則

其大小可知矣政德在素興之後則其所營宮室當

在城外東北隅也春登今東門外里名金汁河之所
經則春登堤金汁河堤也雲津河卽盤龍江則雲津
堤乃盤龍江堤也此二堤捍禦蓄泄灌溉滋益大有
殊功或素輿爲之亦有深意不僅僅爲游觀設也稜
稜同凡平正而有廉隅者曰稜而農夫指町畦之遠
近多少曰幾稜音轉去聲然則此金稜銀稜猶云金
堤銀堤讀稜爲去聲耳又考別本云金稜俱種迎春
柳黃花入河如金汁然故呼爲金汁河銀稜俱種素
輿白花入河如銀汁然故呼爲銀汁然字書云雨雪
雜下曰汁又考素馨本名那悉茗亦名野悉密種自

波斯國來波斯崑崙向爲雲南屬國則其來已久似
不因素輿得名粵志以素馨爲劉漢時女子名此花
生其墓上故以爲名情史花田事指此至於縷穿盤
髻見於唐人詩句今閩粵皆然不始於雲南之素輿
也其若遇歌則開馮舞則動相傳雅州虞美人草亦
如此曾寄問雅州守遍訪無此草是亦與此素馨花
均屬傳訛者也玉案山俗呼棋盤山夷名列相蒙山
在城西二十里三泉者商山下冷泉名蓮花池在城
北最近玉案山下菩堤泉迤邐而瀉西壁爲瀑布文
殊山下有文殊泉亦在城北今荒烟蔓草舊跡難尋

而吐水流觴風流可想也

慶歷三年大理國人廢其君段素興而立思平曾孫智恩之子思廉

素興居位五年廢私稱天明皇帝

滇史素興無道不恤國事故國人廢之時思良之後無可立者乃更立思平曾孫智恩之子思廉爲君

段思廉立改元保安又改正安政德保德

皇祐二年思廉命高智昇伐允賢克之以白崖和甸賜之

四年擢授高智昇爲統矢

滇雲歷年傳

卷五

七

五年春廣南蠻與狄青戰敗奔大理

至和二年經制廣西余靖遣都監蕭注入特磨道生獲智高母及其弟智光子繼宗繼封

余靖募死士重譯至大理求智高

段思廉函僮智高首赴京師

通鑑僮氏自唐初卽雄於西原世爲廣源州首領唐末交趾強盛廣源服屬之知儻猶州僮全福爲交人

所殺其妻改適商人生智高冒姓僮氏旣壯與其母

據儻猶州建國曰大歷交人攻而執之釋其罪使知

廣源州智高怨交趾乃乘間襲據安德州僭稱南天

國改元景瑞因招納亡命貢獻中國求內附朝廷不許復奉金函書以進亦不報智高怒與廣州進士黃師宓等謀據廣南乃悉出弊衣易穀食給言洞中饑饉部落離散知邕州陳珙信之不設備智高一夕忽縱火焚其居因給燬曰平生積蓄俱爲天火所焚生計窮矣當取邕廣以自王否則兵死獄從之遂率衆五千沿江東下攻邕州橫江寨守將張日新等戰死詔江南福建等路發兵備之智高攻陷邕州執知州陳珙等欲任司戶孔宗旦以事宗旦不屈大罵而死智高卽州建大南國自稱仁惠皇帝改元啟歷置官

滇雲歷年傳

卷五

八

屬時天下久安廣南州郡無備智高所向守臣輒棄城走遂陷橫貴藤梧康端襲封八州知封州曹覲知康州趙師旦皆戰死智高進圍廣州知州衛瓘力戰禦之知英州蘓緘蒐募壯勇數千人赴援扼賊歸路得黃師宓父斬之以徇而轉運使王罕亦自外至募民兵益修守備城得不陷事聞詔鈐轄陳曙等發兵討之又以余靖爲廣西安撫使同提刑李樞及陳曙經制賊盜事復以楊岐體量安撫廣南發廣東鈐轄兵赴之智高陷昭州鈐轄張忠以敗聞詔以孫沔爲廣南安撫使時智高寇擾甚嶺外騷動楊岐等久

無功帝以爲憂智高移書行營求邕桂節度使會狄青上表請行遂以爲宣撫使提舉廣南經制賊盜事青入對請得蕃落數百騎益以禁兵帝命與之仍詔嶺南諸軍皆受青節度青行軍整行伍明約束野宿皆成營柵行至廣南合孫沔余靖之兵進次賓州戒諸將毋得妄與賊鬪聽吾所爲廣西鈐轄陳曙乘青未至輒以步兵八千擊賊潰於崑崙關殿直表用等皆遁青曰令之不齊兵所以敗晨會諸將堂上揖曙起拜招用等三十二人按以敗亡狀驅出軍門斬之沔靖相顧愕眙諸將服慄莫敢仰視青既誅陳曙因

按兵止營令軍休十日衆莫測賊覘者還言軍未卽進青明日卽整兵自將前軍孫沔將次軍余靖爲殿夕次崑崙關整大將旗鼓諸將環立帳前待令乃發而青已微服與先鋒度關趨諸將會食關外賊方覺悉出逆戰右將孫節搏賊死山下賊氣銳甚沔等懼失色青執白旗麾蕃落騎兵從左右兩翼擊之從橫開合步伍不亂賊不知所爲大敗走追奔五十里斬首數千級賊黨黃師宓儂建中及僞官屬死者百五十七人生擒賊五百餘死者萬計智高夜縱火燒城遁去由合江口入大理遲明青按兵入城獲金帛鉅

萬招復老壯七千二百嘗爲賊所俘脇者慰遣之梟
師宓等於城下斂屍築京觀於城北隅時賊屍有衣
金龍衣者衆謂智高已死欲以上聞青曰安知其非
詐耶寧失智高不敢誣朝廷以貪功也廣南悉平捷
至帝以余靖經制廣南追捕智高而詔青沔還朝後
二年靖遣都監蕭注入特磨道生擒智高母及其弟
智光子繼宗繼封又募死士使入大理求智高重譯
得至會智高已死於大理函首至京師乃誅其母及
其妻子

說按儂智高擾亂五年俱在兩粵境內卽狄公戰功

滇雲歷年傳

卷五

十

亦不涉於滇雲特因智高之母拜其弟與子俱於特
磨擒而高又竄死於大理函首京師此非細故也故
提綱余靖二條而以狄青本末分注焉

神宗熙寧元年段思廉遣使入貢

滇攷初函送儂智高首於京師段氏始聞名於中國
至是遣使入貢朝廷以非舊典不領於鴻臚別爲禮
遣而已

六年段思廉避位爲僧在位三十一年私謚世宗子廉

義嗣

段廉義立改元上德

九年段廉義遣使入貢

元豐二年段廉義作六龍王會

三年段廉義爲其臣楊義貞所弑在位六年私稱上德

皇帝

楊義貞自立稱皇帝改元廣安篡位凡四月岳侯高智

昇命子昇泰起東方兵誅之而立廉義之姪壽輝

段壽輝立改元上明是時日月交晦星辰晝見

段壽輝以靖難功加高智昇太保封德侯子昇泰封善

闡侯代智昇爲相以其弟義勝治祿琫以高福守易門

以高連慶治羅部以其姪泰運守安寧又於楚雄築外

滇雲歷年傳

卷五

十一

城號德江城以封其姪子量成

滇攷先是高氏佐思平建義世爲顯官至是以靖亂

功加封祚土一門之盛半於大理壽輝亦見逼不自

安矣

四年段壽輝托以天變避位爲僧在位二年私稱上明

皇帝立思廉孫正明

五年段正明立改元保定又改建安天祐

哲宗紹聖元年段正明避位爲僧在位十三年私稱保

定皇帝國人奉善闡侯高昇泰立之

南詔野史段氏世衰人心漸歸高氏正明畏其逼因

避爲僧群臣遂請高昇泰爲君也

大理國相善闡侯高昇泰逐其君段正明自立僭號大
中國改元上治

南詔野史昇泰茫湧邑人將生時其父智昇禱於石
雲寺回遇一老人云汝家當生貴子昇欲問之忽不
見是日昇泰生長佐其父伐叛討逆功績赫然一日
從其君正明出遇狂風吹倒明馬泰救之免顛越益
得幸賜妻賞地勢日以隆正明畏逼褻裳去之國中
臣民皆曰楊義貞之篡段氏亡矣國固高氏之國也
今段氏微君已委脫而去非高爲主人心其安歸乎

滇雲歷年傳

卷五

七

遂共相推戴而昇泰亦不辭也

三年高昇泰有疾遺命還國段氏而卒居位二年移謚
富有聖德表正皇帝

滇考昇泰立二年將死謂其子泰明曰段氏不振國
人推我我不得已而從之今其弟已長可還其故物
爾後人勿效尤也昇泰死泰明遵父遺命立段氏子
正淳正明弟也

四年段正淳立改稱後理國改元天授以高泰明爲相
滇史高泰明爲相以其弟泰運爲柵主一凡賞罰政
令皆出其門正淳擁虛位而已時國人稱之爲高國

主外徼波斯苻密等國來貢大理者皆先謁相國焉
是年又改元開明赦免差役

徽宗崇寧元年修楚雄城

二年段正淳又改元天正遣高泰運入朝求經籍得六
十九家并方藥書六十二冊以歸

四年段正淳又改元文安鄯闡高觀音進金馬杖八十
節所部人民三萬三千戶

段正淳授高觀音爲安東將軍賜以八章禮衣龍頭劍
大理屬夷波斯崑崙緬三國同進白象香物

五年十一月彗星出西方

滇雲歷年傳

卷五

七

大理國中大疫

大觀二年段正淳避位爲僧在位十三年私稱文安皇
帝號中宗子正嚴嗣

段正嚴立改元日新又改文治永嘉保天廣運

三年中元節大理各方貢正嚴金銀羅綺犀象珍寶以
億萬計貢馬遍蒼山

滇記正嚴勤於政事故遠方慕之悉來貢獻

四年大理地震倒十六寺壞民居無數

三十七部夷叛相國高泰明討平之使四子高明清鎮

守

政和二年緬人進金花犀象於大理

三年段正嚴遣儒官鍾震黃漸賚勅褒相國高泰明忠

貞

五年段正嚴遣使入廣南求內附廣州觀察使黃璘奏
聞許之

滇記正嚴向慕中國與國主高量成謀入貢從廣南
東道請之

蛻按中國都秦則滇雲貢道由蜀西漢隋唐是也中
國都洛則滇雲貢道由粵東漢及宋是也後世郡縣
定制則郵傳俱由黔楚者蓋以燕京在北周道如砥

滇雲歷年傳

卷五

十四

其直如矢形勢然也而或者云黔途一綫開自明初
先皆荆棘者非也又按此時高泰明爲相何以又有
國主高量成國主非官名恐是塞主之訛蓋高泰運
曾爲寨主今或量成繼之耳

六年段正嚴遣使李紫琮等入朝貢獻

七年詔使勅封段正嚴爲金紫光祿大夫檢校司空雲
南節度上柱國大理國王

滇考政和六年段正嚴遣李紫琮等貢馬二百八十

匹及麝香牛黃細氈碧玕山諸物又有樂人善幻戲

卽大秦犁韃之遺名五色鬘弄徽宗愛之以供歡晏

賞賜不貲明年封段和譽爲大理國王和譽卽正嚴
也時宋以大理內附或請於大渡河外置城邑以便
互市詔問得失知黎州宇文常言太祖觀地圖畫大
渡河爲境歷百五十年無患今於河外置城邑邊障
開非中國之福乃止治黎州高祖嘗以輝煌
是年六月大理相高泰明卒追封國師以其弟高泰運
爲相

六月朔二日并出

宣和元年大理相高泰運貽木夾於邊將求入貢

欽宗靖康元年閏五月金星入月大火焚二千九百家

滇雲歷年傳

卷五

五

高宗紹興三年遣使請廣西求入貢奏聞優詔答之

六年段正嚴遣詣廣西經畧安撫司請奏貢象馬詔護
送行在所優禮答之

十七年二月大理彗星出幕寧遠矣空破馬地方諸夷
叛發兵征之大敗

三十七部夷叛攻平國公於鄯闡高明清力戰卻之

段正嚴避位爲僧在位四十年私稱宣仁皇帝號憲宗

子正興嗣

段正興立改元永貞又改大寶龍興盛明建德

十八年騰永叛高明清討平之

六月高量成討三十七部叛夷平之以姪壽貞爲中國
布燮自號中國公退居楚雄

二十年三月十四日大霧十日不辨晝夜

孝宗乾道八年正興避位爲僧在位二十五年私稱正
康皇帝號景宗子智興嗣

段智興立改元利貞又改盛德嘉會元亨安定

九年段智興遣李觀音得等至橫山寨求市馬知靜江
府張栻令邕管選峒丁以備之

淳熙元年高觀音隆立奪壽昌位與姪貞明

十一月阿機起兵同正明入國奪貞明位還壽昌貞明

滇雲歷年傳

卷五

奔鶴慶

三年高觀音自白崖破河尾關入國奪壽昌位

四年盜入善闡

野史有成賢成正二人是高氏外孫來謁明國公於
鄯闡意不測與之盟於天王廟二人口含丁香葉出

廟吐之曰盟非我也葉也未幾潛兵入鄯闡忽有白

馬神誅二人白馬神廟中力士也

蛻按高氏自昇泰篡位後雖已還國於段而大權悉

在高氏故國人悉以國主稱之正嚴卽勵精圖治且

四十年之久究亦不能挽回萬一蓋勢之所趨如水

之就下回狂障決不可得矣然高泰明相時其諸子弟姪便已內爭外叛漸成泛濫自泰明死泰運相高量成乃遂稱國主改年號居然與段氏并立想亦東西各占一京也野史載高量成改元大寶高貞明改元興正皆屬悖謾不經而名如壽昌眞昌壽貞亦復訛混不清至於平明中三國公無有名姓難以考晰今爲稍加訂錄恐猶未免有三豕一魚之誤於其間也嗟乎春秋三傳且以見聞異詞新舊唐書尙復簡繁互異何況此區區僭國之殘編南荒之野錄而冀其一無訛謬也不亦難哉

滇雲歷年傳

卷五

七

八年明國公卒追尊爲義地威天聰明仁帝

說按別本云眞昌是明國公然何以此人獨又追尊爲帝殊不可解但自後直至國亡高氏亦無有更爲國主者矣

寧宗慶元六年段智興卒在位二十九年私稱功極皇帝號宣宗子智廉嗣

段智廉立改元鳳歷

嘉泰二年遣使入臨安取大藏經一千四百六十五部置於五華樓

開禧元年段智廉卒在位六年私諡享天皇帝無子傳

於其弟智祥

段智祥立改元天開又改仁壽

嘉定五年征三十七部夷追至尋甸平之

高阿容爲國主廣建寺宇廢國事榆城高隆代之

理宗紹定三年六月十七日河水絕流次日未時水始

復流如常

六年高隆下鄯闡以光日爲演習

高泰祥爲相

嘉熙二年段智祥卒在位三十四年松號神宗皇帝子

祥興嗣

滇雲歷年傳

卷五

六

段祥興立改元道隆

淳祐元年段祥興請道黎雅入貢黎守闡師古爲言於

安撫使孟珙卻之使道邕廣

蛻按段氏自改稱後理向慕中國志不少衰而南宋

君臣視之蔑如者終鑒於唐李之禍也夫士不通經

博古固不足以宏濟艱難然而執經泥古者豈可以

彌綸宇宙乎以天下大勢而論宋之視滇猶唐之視

蜀也若使滇不慕宋猶當來之柰何持迂儒之陋見

而必阻其向化之心乎且橫山市馬張栻旣戒嚴而

塞其道矣今請黎雅入貢孟珙又不許而使之道於

邕廣是枳絕於南珙阻於北則滇將不得不併於元而宋亦歸於無可復之惟有終之於蹈海而已亦勢所必致也嚮使滇蜀相聯與吳玠爲犄角則蜀必益堅而滇亦豈遽爲元人之魚肉哉

四年蒙古兵出靈關段祥興遣將高禾迎戰兵敗死之會蒙古主卒師還

滇考祥興未立之先元太祖帖木真將南征大理至鐵橋石門關遇獨角獸作人言而還至是宋余玠守重慶元不能入乃議由吐蕃出大理段氏懼請道黎雅入貢以議備禦之策宋孟珙卻之

滇雲歷年傳

卷五

九

蛻按自內地而論則蜀爲滇之障蔽故漢之開滇必由蜀自外蕃而論則滇爲蜀之臂指故唐之破蕃必合滇今宋之季元人從秦而攻蜀又從蕃而入滇其意常在蜀也滇殘則蜀亦殘矣故爲宋人計必當聯滇以保蜀在昔韋臯之所以大破吐蕃而保安全蜀招徠蒙氏之力也今天理猶汲汲於通貢諸朝以圖保蔽而有宋諸公恬然不察宜乎兩忠武之功不可再見也已嗚呼牛目之見一隅雉首之藏撮土類如此矣

六年段祥興遣廉祐入朝詔使同來致經籍拜賜銀百

兩文一通諭祭拒元死事高禾

十一年段祥興卒在位十三年私諡孝義皇帝子興智

嗣

段興智立改元天定

十二年八月元太弟忽必烈征雲南大理相高泰祥拒戰不勝

史元憲宗二年八月遣太弟忽必烈征雲南破吐蕃出石門所過降之

寶祐元年九月元師過大渡河遣三使至大理招段興智皆殺之

滇雲歷年傳

卷五

千

史元師次忒刺以大將兀良合台總諸軍事分爲三道以進自臨洮經行山谷二千餘里至滿陀城過大渡河遣使三入大理招興智被殺

大理相高泰祥守金沙江太弟令草囊以濟摩莎蠻主迎降

史高泰祥守金沙江太弟令草囊以濟入白蠻打郭寨摩莎蠻主率先降附

蛻按草囊縫羊皮爲之方圓如五石筩俗呼渾沌人物憑之浮渡黃河自河津而上皆有之亦有聯竹木作筏架於渾沌之上以任載者或曰非也吐蕃中以

生牛草縫合爲船每船可載一二十人今哈喇烏蘆
濟渡名曰皮船者是也如前合囊字如後合草字因
地制宜在人神明之耳摩莎卽麼些今麗江地也

十二月薄大理城國主段興智及其相高泰祥屢戰大
敗

元兩路兵皆至段興智奔鄯闡高泰祥奔姚州

使 太弟忽必烈接兵入城下令不殺令姚樞訪圖籍祭三

史姚樞從忽必烈征大理嘗預夜晏陳宋太祖遣曹
彬取江南不殺一人市不易肆事明日忽必烈據鞍

滇雲歷年傳

卷五

三

呼曰汝昨夕言曹彬不殺事吾能爲之吾能爲之及
師至大理忽必烈命樞裂帛爲旗書止殺之令分號
街陌由是民得相完

元兵追興智不及獲泰祥不屈死之

史泰祥奔姚州被執論之降不屈命斬於五華樓下
泰祥臨刑歎曰段運不回天使之然爲臣隕首吾事
畢矣時白日當午忽雲起雷震太弟異之曰忠臣也
禮葬之而官其子

元太弟立平雲南碑於點蒼山

次年春太弟忽必烈自大理班師留大將兀良合台總

督軍事

史兀良合台分兵取附都鄯闐轉攻烏蠻合刺章水城又破羅部大酋高昇進至押赤城城際滇池三面皆水由北門縱火攻之不克乃出奇制勝至昆澤克之段甫出降

元大將兀良合台攻鄯闐拔其城虜興智赦之大理國亡

史元憲宗四年虜興智赦以爲摩訶羅嗟領諸蠻段興智從元帥兀良合台征吐蕃降之

史兀良合台率諸軍自吐蕃進攻烏白蠻及鬼蠻等

滇雲歷年傳

卷五

五

部所向風靡羅羅斯及阿伯兩國大懼舉國降及乘勝攻下阿魯諸酋

西南夷悉平設大理都元帥府錄段氏子孫世守之

史憲宗五年諸部悉平得五城八府四郡三十七部立萬戶府十有九以大理爲都元帥府仍錄段氏子孫世守其土

段興智從元帥征交趾

史六月兀良合台遣兵入交趾先使諭降皆見囚及兵至洮江交人戰敗其王陳日賏走海島蒙古得前遣使於獄中曾以破竹束體入膚比釋縛一使死囚

屠其城

段興智朝蒙古主獻地圖

史元憲宗六年興智從征交趾後入覲獻地圖及治民立賦之法元主嘉納之

元世祖中統元年段興智入朝道卒詔贈向義王

史世祖卽位興智入朝卒於路訃聞元主震悼輟朝遣官諭祭追贈大理向義王賜物歸葬

蛻按段氏之據有大理也始終未奉朝命然王斧一畫三百餘年猶宋與之耳彼雖歷世建元而必統之以宋朝者理也迨其季世求朝請貢再四歸誠而宋終卻之遂爲元有地爲元地人是元人雖曰宋祚未移寧得不書元朔大凡志傳貴乎直書少存偏見於胷中則滋謬矣再考野史載有論祭文一篇體裁尠陋文理荒蕪定是贋作故削之

二年段興智弟信直日入朝賜虎符詔領大理諸郡

滇考元旣滅段氏而有其地仍資其兵力以制服諸蠻興智死仍以其弟段實爲總管守大理二年入覲賜璽書令爲中慶總管轄大理鄯闡威楚統矢會川建昌騰越八府仍令各處萬戶以下并聽節制

野史勅日向率我師往臨爾境衆據國人之請因從

城下之盟款附以來忠勤益著庸示至優之典以彰興繼之恩錫以虎符授之總管世守中慶鄯闡大理會建騰永等處安撫已附之民招集未降之國卿其勉之

至元元年東爨妖僧舍利倡亂諸部并起信苴日合兵討平之

滇考信苴日卽段實至元初討平舍利又攻曲靖尋甸等城有功受重賞屢陞行省參政

四年立大理等處行六部

是年八月以皇子忽哥赤爲雲南王九月移鎮大理

滇雲歷年傳

卷五

五

五年達魯花赤愛魯從雲南王征金齒諸蠻率兵絕縹甸道斬首千餘級

雲南王署王府文學張立道爲勸農官領屯田事

傳張立道字顯卿陳留人至元中以王府文學從皇子雲南王忽哥赤之鎮勸王務農以厚民生卽署爲

勸農官領屯田事

元帥寶合丁弒雲南王忽哥赤文學勸農官張立道等共討賊遂誅寶合丁詔立道入朝旌之

傳元帥寶合丁毒殺忽哥赤立道潛結義士十三人

約共討賊刺臂血和金屑飲之推一人走京師告變

事頗露寶合丁乃囚立道將殺之提舉張忠者於立
道爲族兄結壯士夜劫出共走及寶合丁伏誅有旨
召立道入朝帝曰汝等爲我家事甚勞苦今欲事朕
乎事太子乎事安西王乎惟意所向立道等奏願留
事陛下於是賜立道金五十兩以旌其忠張忠等亦
皆授官有差

六年愛魯再入金齒諸部定其租賦平火不麻等二十
四砦

七年改善闡萬戶府爲路又併大理上下二萬戶府爲
路

滇雲歷年傳

卷五

五

志併大理爲路立軍民總管府領錄事司一縣一和

府二永昌永昌府領縣一永平州五鄧川蒙化趙鄧川

領縣一姚州領縣一姚

是年十二月金齒縹緲三部酋長內附

詔授愛魯爲中慶路達魯花赤兼管爨越軍

八年分大理國三十七部爲南北中三路改威楚萬戶

府爲路

志改威楚爲路立總管府領縣二威楚州四鎮南

遠南安州領縣一廣

勅遣阿魯忒兒等撫治大理諸蠻

十年立雲南行中書省

中慶路達魯花赤愛魯疆理永昌田增闢不擾

三月以張立道爲大理等處巡行勸農使千五百哨其地
傳十年三月領大司農事中書以立道熟於雲南奏
授大理等處巡行勸農使佩金符其地有昆池環五
百餘里夏潦暴至必冒城郭立道求泉源所自出役
丁夫治之洩其水得壤地萬餘頃俱爲美田爨爨之
人蠶桑未得其法立道教之飼養滇民富庶羅羅諸
蠻相率來降收其地悉爲郡縣

十一年拜賽典赤瞻思丁雲南行中書省平章政事并

滇雲歷年傳

卷五

美

以信苴曰爲大理軍民總管

史上謂賽典赤曰雲南比因委任失宜使遠人不安
欲選長厚者撫治莫過於卿賽典赤卽訪熟知雲南
地者畫其山川城郭夷險遠近爲圖以獻帝悅遂拜
平章政事行省抵雲南時宗王脫忽魯鎮滇惑於左
右具甲兵爲備丁善處之王大悅由是政令一聽丁
所爲

愛魯於中慶版籍闡實得隱戶萬餘以四千戶卽其地

屯田

改北路爲武定路軍民府

志府領州二和曲和曲領縣二南甸祿勸領縣二龍

石

十二年籍師宗彌勒二部為軍立廣西路

詔以雲南蠻夷未附者尙多聽行省節度置郡縣尹長

選廉能者任之

史賽典赤於是奏諸夷未附者今擬宣慰司兼行元

帥府事并聽行省節制又奏哈刺重雲南壤地宜改

置令長并從之

十三年賽典赤以改定雲南諸路各號上聞

立雲南行中書於善闡改為中慶路始置郡縣諸路各

滇雲歷年傳

卷五

七

升改建置

志中慶路今雲南府領錄事司一昆明富民宜良縣

三嵩明晉寧昆陽安寧州四嵩明領楊林邵甸晉寧

領呈貢歸化昆陽領三泊易門安寧領祿豐羅次

改南路為臨安路

志領河西蒙自縣二捨資千戶一建水石屏寧州三

寧州領通海嶠嶠二縣

改中路為曲靖總管又改茶罕章為麗江路立軍民總

管府改仁地萬戶府為仁德府領為美歸厚二縣又立

巴的甸為烏撒路

賽典赤奏雲南風俗未變宜建學明倫從之

史賽典赤創建孔子廟購經史置學田率民以禮文

教聿興

奏請建設各所司官署

奏言雲南貿易未諳鈔法請以交會貳子公私通行庶
爲民便從之

作陂池以備水旱築松華壩於城東北上修南壩闡於
城南盤龍江

志贍思丁經畫水利創築松華壩分盤龍江水入金

汁河并修建寶象馬料海源銀汁合爲六河均用閘

滇雲歷年傳

卷五

庚

座蓄洩灌漑萬頃軍民感之

十四年四月廣南溪峒儂士貴左江李維屏右江岑從

毅等俱赴行省納款

交趾遣使請爲藩臣

傳交趾叛服不常贍思丁遣人諭以禍福約爲兄弟

交趾王大喜乞爲藩臣

羅槃甸夷叛賽典赤徃征至遣使諭降之

傳賽典赤徃征之有憂色從者問故曰憂汝曹冒鋒

鏑或不幸以無辜死又憂汝曹劫虜平民使叛則又

從而征之耳師次羅槃三日不降諸將請攻之不許

遣使徃諭越三日不降諸將復請攻又不許俄而將卒有乘城進攻者遽鳴金止之召而叱曰吾奉命安撫不奉命殺戮也無主將令而擅攻法當誅命左右縛之諸將叩首請俟城下從事羅槃酋聞曰平章寬仁拒命不祥乃舉城降諸夷聞風翕然欵附夷酋謁見例有獻納悉賜從官貧民秋毫無所私每爲酒食勞酋長製衣冠易其弁服草履酋皆感悅服從

蛻按賽平章視諸夷如保赤子誠可以動天地泣鬼神後世遇小小蠢變而文檄輒云盡行屠滅惟恐稍留噍類者仁暴相去奚翅天淵

滇雲歷年傳

卷五

元

賽典赤行視要隘置鎮巡防

傳相地置鎮鎮設土酋吏百夫長各一人行者或劫掠則罪之有土吏數輩被黜至京愬其事擅僭妄數事帝顧侍臣曰丁憂國愛民此輩之告誣也命械送丁旣至脫械諭之且與之官職皆叩頭謝誓以死報緬蒲甘蠻寇金齒大理路蒙古萬戶忽都大理總管信苴日等合擊大破之

史十四年三月緬人以阿禾內附怨之攻其砦欲立塞於騰越永昌之間時永昌之西騰越蒲驃阿昌金齒未降大理路蒙古萬戶忽都大理路總管信苴日

總把脫羅脫孩方奉命伐之駐師南甸阿禾來告急
忽都等遂晝夜行與緬軍遇一河邊其眾約四五萬
象八百馬萬匹忽都等軍僅七百人緬人前乘馬次
象次步卒象披甲背負戰樓兩傍挾大竹筩置短槍
數十於其中乘象者取以擊刺忽都下令賊眾我寡
當先衝河北軍親率二百八十一騎爲一隊信苴日
以二百三十三騎傍河爲一隊脫羅脫孩以一百八
十七人倚山爲一隊交戰良久賊敗走信苴日追之
三里抵寨門旋渾而退忽南面蠻兵萬餘繞出官軍
後信苴日馳報忽都復列爲三陣進至河岸擊之又

滇雲歷年傳

卷五

三

敗走連破十七砦遂北至窄山口轉戰三十餘里賊
及象馬自相蹂躪死者三巨溝日暮忽都中傷始收
兵明旦追之至于額不及而還捕獲甚眾軍中以一
帽或一靴一氊衣易一生口其脫者又爲阿禾阿昌
邀殺歸者無幾官軍負傷雖多而蒙古止一人被象
擊死者是役也段苴日進宣慰司世襲都元帥
十五年除張立道中慶路總管佩虎符

史先張立道爲巡行勸農使建孔子廟於五華山右
置學舍教其子弟擇士之賢者爲師歲時率諸生行
釋菜禮人習禮讓行省平章賽典赤表言於朝有旨

除中慶路總管佩虎符

五月詔烏蒙路總管阿牟置驛路聽賽典赤贍思丁節

制

以烏撒路爲軍民總管府

九月定雲南稅賦用金爲則以貝子折納

史每金一錢直貝子二十索

蛻按滇昔用貝名曰肥而其准折金銀之數先後多寡不同亦猶錢之依時定價也今考據新興州志曰肥一枚曰莊四莊曰手二十手曰索二十索曰袋五袋卽一百索每百索值銀一兩明嘉隆間兩經鼓鑄

滇雲歷年傳

卷五

三

錢法不通至天啟時錢始行而每銀一兩價直貝三百索及明末至七百索而始廢夫錢貨貝肥皆行等耳用之斯貴舍之斯賤交會頭子無不如是但數數紛更至使民間無所適從則非徒無益而又害之矣經世者可不慎諸

遷愛魯爲雲南諸路宣慰使副都元帥討烏蒙羅佐山白水江叛蠻悉平之

十六年陞中路羅伽部爲澂江路

志領縣三

河陽江川陽宗

州二

新興路南

新興領

普舍初和

路南領邑

市縣三

雲南行中書省平章政事賽典赤贍思丁卒

傳贍思丁回回人其國言賽典赤華言貴族也至元十二年拜平章行省撫雲南者六年卒年六十九百姓巷哭塋善闡北門交趾王遣使衰絰致祭帝思其功詔省臣守其成事不得輒改大德元年贈咸陽王諡忠惠子五人長納速刺丁累官雲南路宣慰使帥大理次哈散廣東道宣慰使都元帥次忽辛雲南行省左丞次苦速丁兀默里建昌路總管次馬速忽雲南諸路行中書省平章政事

蛻按今省城東南數里有地名鞞耳朶忠惠王墓也

滇雲歷年傳

卷五

三

元以帳殿爲鞞耳朶凡幕帟皆呼之因塋時張幕其地故以爲名但前後志俱稱墓在城北今本傳亦曰塋善闡北門然則石虎關迤南一帶俗呼爲南古城者善闡城舊址也今省城移建於此在元在明皆不可知而王墓已在城之東南矣志乘似宜更正之授愛魯行中書省參知政事供征緬餉餽

十七年中慶路總管張立道入朝遂命爲臨安廣西道宣撫司兼管軍招討使

傳立道入朝請於帝以雲南王子也先帖木兒襲王爵帝從之遂命爲宣撫兼招討使陞辭賜弓矢衣服

鞍馬

承泥路大首領必思反張立道討平之狗金齒甸七十城

傳立道始赴任會泥路必思反煽動諸蠻亟發兵討之拔其城邑鼓行而前狗金齒七十城越麻甸抵可滿皆下之有遺馴象金鳳異物者悉貢於朝

拜也罕的斤雲南行省參知政事征幹端平之

十八年復廣西路軍爲民領師宗彌勒二州以信苴日爲宣撫使都元帥尋拜雲南路行中書省參知政事

滇雲歷年傳

卷五

三五

納速刺丁以軍抵金齒招安蒲縹曲蠟緬諸夷寨

傳贍思丁長子納速刺丁累官雲南路宣慰使帥大理時緬犯永昌納速刺丁以軍抵金齒蒲縹曲蠟緬國招安夷寨三百籍戶十二萬三百定租賦置郵傳立衛兵歸以馴象十二入貢

鎮西緬麓川等路宣撫使達魯花赤怯烈疏通成都烏蒙諸驛路置馬給傳以便往來

詔授納速刺丁行中書左丞尋陞右丞奏罷規措所元帥府官

傳時雲南省臣撫綏失方納速刺丁諫言三事一謂

雲南省規措所造金簿貿易病民宜罷一謂雲南有
省有宣慰司又有都元帥府宣慰司已罷行省既兼
領軍民則元帥府亦當罷一謂雲南官員子弟入質
達官子弟宜遣餘當罷奏可

蛻按規措所是規畫財利之官署所司官吏以善賈
爲之至元二十二年世祖聽盧世榮言天下皆立之
十九年春二月遣諸王相答吾兒擊緬詔征緬官悉聽
雲南王節制

史初納速刺丁自緬還上言熟其國形勢可擊帝遂
以大卜爲左丞也罕的斤爲參政令諸王相答吾兒
滇雲歷年傳卷五
督諸軍復往擊之

信苴日迎師至金齒病卒以其弟忠爲大理宣慰司軍
民萬戶府子慶爲宣慰使都元帥

九月遣使括雲南金

命雲南諸路皆建學以祀先聖

緬敗忽都帖水兒兵復以思播田楊二姓兵助之

二十年調軍益戍雲南開雲南驛路分亦奚不薛地爲

三設官治之

志亦奚不薛黔中地名

詔嚴禁雲南管課官員不得於額外取錢

十一月相答吾兒等分道擊緬破之西南夷十二部俱降

史諸王相答吾兒及右丞太卜等公道攻緬招討使怯烈造舟於阿昔阿禾順流攻江頭城破之遂遣使招諭其王不應以建都太分城是其巢穴復進軍援之

二十一年正月置邦牙宣慰司於蒲甘命雲南王率怯烈移駐鎮緬

史初金齒諸夷欲降制於緬不能達既克緬二城十二部皆內附故遂置司移鎮

滇雲歷年傳

卷五

三五

烏蠻叛雲南諸路提刑按察使司判官趙世延會省臣討平之擢世延爲監察御史

改烏撒總管府爲宣撫司

蛻按烏撒今威寧州地屬黔省元時兼轄烏蒙故存此條

進納速刺丁爲雲南行中書省平章政事

傳納速刺丁爲平章奏減哈刺章冗官歲省俸金九百餘兩

納速刺丁選官專督屯田課程歲增金五千兩

志元世祖至元間立雲南軍民屯田於中慶路民屯

四千二百九十七戶田一萬九千六百二十四雙軍屯七百九戶田二千八百三十六雙曲靖路民屯二千二百四十戶田四千四百八十雙仁德府民屯八十戶田一百六十雙軍屯一百戶田四百雙臨安民屯二千三百戶田四千雙軍屯二百八十八戶田一千一百五十二雙激江民屯一千二百六十戶軍屯二百九十五戶梁千戶翼軍屯凡七百人田三千七百八十九雙武定路軍屯一百八十七戶田七百四十八雙烏撒路軍屯一百一十四戶東川路民屯八十六戶會通民屯二戶建昌民屯一百四戶軍屯一

百八十戶會川路民屯四十戶德昌路民屯二十一戶軍屯一百二十戶大理金齒等處民屯三千七百四十一戶軍屯六百戶共軍民田二萬二千一百五雙威楚路民屯一千一百一戶田五千五百五雙軍屯三百九十九戶田一千五百九十六雙又提舉司所領民屯三十三戶田一百六十五雙鶴慶路民屯一百戶田四百雙軍屯一百五十二戶田六百八雙按王庭筠詩招客先開四十雙王弇州註云雙五畝也四十雙二百畝也輟耕錄謂一雙爲四畝佛地以二畝爲一雙大抵各從方俗而名之未必有定數

也又雲南雜志云俗耕田三人使二牛前牽中壓後驅犁一日爲一雙此似不然人牛之力強弱不齊一日之犁多寡難定安可以之爲數乎南詔異牟尋定制上官授田二百畝爲四十雙以是爲差人無貴賤皆耕不徭役人歲輸米二斗然則一雙爲五畝無疑矣此法沿段及元想未改動故其立軍民屯田自二雙至五雙不等則每人授田二十畝上下也考至元十九年籍雲南新附戶先是兀良合台鎮雲南凡入籍民戶已回籍民田民以爲病至是令已籍者勿動新附籍之想前項戶田乃新附入籍之數非土著通

滇雲歷年傳

卷五

三

數也以此觀之元亦行限田法勿謂此迂儒謬論也
二十二年罷麗江路總管府立宣撫司

志司領府一

北勝州七

順州浪葉永安通安蘭州巨津寶山

巨津領臨西

縣一

遷張立道臨安廣西道宣撫使

史張立道又籍兩江儂土貴岑從威李維屏所部戶二十五萬有奇以其籍歸有司旣宣撫臨安復創廟學於建水路書清白之訓於公廨以警貪墨風化大行明年入朝條陳十二策帝嘉納焉

二十三年立鶴慶路軍民府

志府領劍川縣

拜也先不花雲南行中書省平章政事
傳也先不花初拜平章時阿郎可馬丁諸種棘夷爲
變討平之遂立登雲等路府州縣六十餘所得戶二
十餘萬官其部長定其貢稅邊境以寧

免雲南從征交趾蒙古軍屯田租

二十四年陞烏撒宣撫爲烏撒烏蒙宣慰軍民萬戶府

二十五年立元江部領步白馬籠二部

愛魯卒詔贈平章政事諡毅敏加贈太師

蛻按元初於雲南用人俱擇才德兼優者如瞻思丁

滇雲歷年傳

卷五

三五

張立道愛魯是也

陞曲靖總管府爲宣撫司

志司領縣一

南寧州五

陸涼越州羅雄馬龍霑益

陸涼領芳華河納

羅雄領通泉霑益領交水石梁羅山

以金沙江西通安等五城隸察罕章廢金沙江東永寧

等五城

以北勝施州爲北勝府

二十六年三月立雲南屯田以供軍儲

六月詔以雲南行省地遠州縣多闕六品以下許本省

選辟以聞

詔併省雲南大理中慶州縣

以程師廉爲雲南行御史臺中丞

傳師廉始至蠻夷部長來賀辭若遜而意甚倨師廉奉宣德意綏懷遠人且明示禍福聞者俱服雲南舊有學校而禮教不興師廉力振起之始有從學問禮者

二十七年以宗室甘麻刺爲梁王鎮鄯

五月奏立銀場官秩從七品

史遣人行視雲南銀硃獲銀四千四十八兩省臣奏立場官司之

滇雲歷年傳

卷五

五

棘夷與蠻部相讐殺省臣受棘夷金奏蠻叛廉訪使梁兒赤劾廢之

傳赤字道明西夏寧州人初爲雲南廉訪副使時諸

蠻叛僚伍悉稱故去赤獨居守八月諸蠻叛省臣大

懼歸符印欲遁赤白梁王檄止之及進廉訪使會行

省丞相帖木迭兒羅織安撫使法花魯丁將置於極

刑赤曰生殺天子大柄方面之官意欲何爲法花魯

丁竟獲免尋復其官至是棘夷與蠻仇殺省臣受賂

助棘夷誣奏蠻叛乃起兵殺掠良民赤奏劾廢之境

得以安後卒於官年六十有二

三十八年立金曲等處宣慰司都元帥府

始立東川路

改立曲靖等處宣慰司管萬戶府

志雲南曲靖路宣慰司所轄地廣民心未安故改立以鎮之

二十九年副元帥忙古帶入覲

史忙古帶契丹人襲父職爲隨路新軍總管以功陞萬戶攻羅必甸至雲南詔以其衆入緬迎雲南王金齒白衣答奔諸蠻往往伏險要爲備忙古帶奮擊破之凡十餘戰至緬境開齒道奉王以還遷副都元帥滇雲歷年傳

卷五

四

先從諸王阿台征交趾至白鶴江與交趾僞昭文王戰奪其戰艦八十七艘又從攻羅必甸破之功俱最至是入覲

四月命設雲南諸學校以蜀士充教官

史先是至元六年中書省之學制頒行之命諸路府官子弟入學上路二人下路二人府一人州一人餘

民間子弟上路三十人下路二十五人願充生徒者免一身雜役以譯寫通鑑節要頒行各路俾肄習之

七月勅雲南省擬所轄州縣官如福建二廣例省臺委

官銓選以姓名聞隨給授宣勅

蠲按福建二廣遣官銓選唐時行之至宋始停元今復行之也

三十年立新興州屯田名曰梁千戶翼軍屯

皇曾孫松山封梁王出鎮雲南

免雲南屯田軍逋租萬石

雲南行中書省右丞納速刺丁卒

傳納速刺丁卒贈上柱國中書左丞相延安王子十
二人忽先仕雲南行省平章政事沙的雲南行省左
丞餘仕各省皆顯官

三十一年四月雲南行省上所定路府州縣凡上路二

滇雲歷年傳

卷五

聖

下路十一下州四十九中縣一下縣五十

成宗元貞元年以張立道爲雲南行省參政

傅梁王出鎮雲南廷議求舊臣可爲輔行者復以陝
西巡臺侍御史張立道爲雲南行省參政視事期月

卒於官

命有司割地給諸蒙古學生充廩饌

授忙古帶烏撒宣慰司旋遷大理金齒都元帥

是年瀾滄江鐵橋成永昌道不虞險涉行旅便之

二年立車里軍民宣慰府與八百大牙相制秋八百叛

命也先不花討之

乞藍蠻平以其地爲雲遠軍民總管府

大德元年以劉正爲雲南行中書省左丞

傳正字清卿青州人時右丞忙兀突魯迷迭請征緬正以爲不可師果無功雲南民歲輸金銀其差官必先重賂省臣乃得差遣及至雲南徵收金銀之數必十加一而折閱之數又如之其送迎餽贖亦如納官之數正疏草其弊給官稱俾土官自輸納夷民便之滇池妖蛟化作少婦爲人害神僧趙伽羅作法遣土主神黑胡擒斬之

蛻按事屬妖異似可不書然石言見左傳宛若載漢

滇雲歷年傳

卷五

聖

書屬事比辭同也

二年立雲南諸路道肅政廉訪司

三年雲南行省通計歲入糧數二十七萬七千七百二十九石

雲南行省右丞忽辛卒

傳辛贍思丁三子大德初改右丞既至除諸不便事宜於宗王王不可辛與左丞劉正馳還京師奏之有旨命宗王協力施行由是一切病民之政悉罷豪民避徭役往往投充宿衛有司不勝供給忽辛按原額所無者悉籍爲民減其宿衛三分之一馬龍州酋謀

大叛陰與外賊通事覺宗王爲左右所蔽釋不問忽辛與劉正反覆研鞫得反狀竟斬之凡軍糧支給吏緣爲奸辛籍軍戶姓名及倉廩處所更番支給吏奸始除先是贍思丁建孔廟立學校撥田正項以供祭祀教養丁卒田爲大德寺所有辛按廟學舊籍歸之乃復下諸郡立廟學選文學爲師文風以興王府畜馬多悉縱之郊敗民禾稼而牧人騷擾民無寧居辛度地置草場構屋爲牧所民得以安廣南酋沙奴梗化辛遣使誘至待以禮留數月不遣酋請還辛曰汝欲還可納印來酋不得已贖印至辛置酒宴勞令贖印

滇雲歷年傳

卷五

四十五

入覲帝大悅時緬酋負固辛遣人諭之曰我老賽典赤平章子也惟先訓是遵兄官府於汝國所不便之事當爲汝更之緬酋聞遂與使者偕來獻白象一旦曰此白象古來未有今聖德所致敢効方物旣入奏帝賜緬酋以世子號烏蒙等租賦歲煩軍徵索辛以利害榜諭諸蠻不遣一卒而田賦完俄有爲飛語惑宗王者辛馳報朝廷遣使臨問凡造言之徒悉誅之辛遂偕使者入覲至是卒於官贈雍國公諡忠簡子二人伯杭中慶路達魯花赤

大理宣慰司軍民萬戶府段忠卒授其姪慶雲南行省

參政

四年立烏撒烏蒙等郡縣置維摩州

段慶入朝妻以公主授爲宣武將軍

五月緬阿散哥也弑其主的立普哇拏阿廸提牙詔遣雲南平章政事薛超瓦兒等發兵討之

史初緬人贈哥倫作亂緬王之弟阿散哥也率其黨囚王於豕牢弑之王次子奔憇京師詔遣薛超瓦兒等率行省兵萬二千人討之緬阿散吉牙等赴闕請罪遂罷兵

雲南諸路行中書省右丞怯烈卒

滇雲歷年傳

卷五

四

傳初怯烈由譯史爲賽典赤幕官撫定諸蠻夷有功遂分省大理會緬人入寇怯烈以戰具資軍士擊走之授行省左右司郎中後擢宣撫司被詔問征緬事宜奏對稱旨賜幣帛及翎根甲征緬時怯烈率船爲鄉導拔江頭城而還復從雲南王征緬總兵三千屯鎮縹國設方畧招其黨由是復業者衆後入覲以烈熟悉緬事仍命領詔至緬宣上威德緬王稽顙聽命遂遣子信合八的入貢官至雲南右丞卒

詔定生員散府二十人上中州十五人下州十人

十二月詔遣雲南行省左丞劉深將兵擊八百媳婦

史丞相完澤以劉深之言勸帝曰世祖以神武一天
下功蓋萬世今陛下嗣大歷服未有武功以彰休烈
西南夷有八百媳婦未奉正朔請往征之哈喇斯曰
山嶠小夷遠絕萬里可諭之使來不必遠勤兵力不
聽竟發二萬人命深及哈喇帶將之往御史中丞董
士選亦言不當輕信一人妄言而置百萬生靈於死
地帝變色曰事已成卿勿復言麾之出

五年夏劉深兵次順元蠻酋宋隆濟等連兵反

史劉深等取道順元遠冒烟瘴未戰而士卒死者已
十七八驅民轉餉谿谷之間一夫負米八斗率數人

滇雲歷年傳

卷五

四十五

佐之數日乃達死者亦數十萬人中外騷然而深復
令雲南調民供餽復脅水西土官之妻蛇節金三十
兩馬三千匹隆濟因給其眾曰官軍徵發汝等將盡
剪髮黥面爲兵身死行陣妻子爲掠勢所必至眾惑
其言遂反隆濟連蛇節率苗僚諸蠻攻破楊黃等寨
進攻貴州知府張懷德力戰敗死之遂圍深窮谷中
梁王濶濶兵救之賊眾稍却

詔雲南行省減內外諸司官千五百一十四員

七月詔薛超瓦兒移兵伐金齒諸蠻

史時征緬師還爲金齒所遮土多戰死金齒地連八

百媳婦諸蠻相效不輸稅賦戕殺官吏詔薛超瓦兒移兵伐之無功

九月免薛超瓦兒爲庶人誅高慶察罕不花

史薛超瓦兒等兵攻阿散哥也不克引還言賊降在旦夕高慶等受其賂首倡爲還計是以無功詔遣官鞠之得薛超瓦兒以下將校受賄狀詔誅慶及察罕不花薛超瓦兒削奪官爵爲庶人

十一月詔梁王提兵會劉國傑討宋隆濟及蛇節

史劉深兵敗帝始悔不用哈喇斯董士選之言乃遣劉國傑及楊賽因不花等率四川雲南湖廣各省兵

滇雲歷年傳

卷五

吳

分道進討諸蠻別勅梁王提兵應之軍中機務一聽國傑處分

以樞密李京出使雲南宣慰烏蠻

傳京字景山河間人由樞密宣慰烏蠻尋陞烏蠻等

道宣慰副使佩虎符兼管萬戶府時烏蠻等道隸雲

南行省京方下車會群蠻不靖按行調發餽給鎮撫

周履滇境後悉其見聞爲志畧四卷以進虞伯生序

之舉其言曰張喬斬奸猾長吏九十餘人而三十六

部盡降諸葛孔明用其豪傑而財富足以給軍國史

萬歲貪賂隨服隨叛梁毗一金不取蠻長感悅李知

古以重賦戮尸張虔陀以淫虐致亂鮮于仲通以褊急失人心李宓以邀功生事全軍覆沒此往事之較著明白者也其術不甚簡易乎其言如此可以知其志矣

六年劉深等糧竭引兵還宋隆濟邀之官軍大敗

史宋隆濟屢攻圍貴州不解深等糧盡道梗不通遂引兵還隆濟復率眾邀之輜重遺棄士卒死傷殆盡南臺御史中丞陳天祥上書諫曰八百媳婦荒裔小夷取之不足以爲利不取不足以爲害而劉深欺上罔下帥兵伐之經過八番縱橫自恣中途變生所在

滇雲歷年傳

卷五

七

皆叛旣不能制亂反爲眾亂所制食盡計窮倉皇退走喪師十七八棄地千餘里朝廷再發四省之兵使劉二巴都總管以圖收復湖南湖北大發運糧丁夫眾至二十餘萬正當農時驅此愁苦之人往回數千里中何事不有比聞從征敗卒言西南諸夷皆重山複嶺陡澗深林其窄狹處僅容一人一騎上如登天下如入井賊若乘險邀擊我軍雖眾亦難施爲或諸蠻遠遁守隘以老我師進不能前旁無所掠將不戰自困矣且自征伐倭國占城交緬諸夷以來近三十年未嘗有尺土一民之益計其所費可勝言哉去歲

西征及今此舉何以異之乞早正深罪仍下明詔招諭彼必自相歸順不須遠勞王師與小醜爭一旦之勝負也爲今之計宜駐兵近境多市軍糧內安外固漸次服之此王者之師萬全之利也苟謂業已如此欲罷不能亦當詳審成敗算定而行彼諸蠻皆烏合之衆必無久能同心捍我之理但急之則相救緩之則相疑以計使之互相讐怨待彼有可乘之隙我有可動之時徐命諸軍數道俱進服從者懷之以仁抗敵者威之以武恩威兼濟功乃易成若復舍恩任威深蹈覆轍恐他日之禍有甚於今日者不報遂謝病

滇雲歷年傳

卷五

吳

去

三月西南夷俱叛詔陝西行省平章政事也速解兒會劉國傑討之免劉深官

史時烏撒烏蒙東川芒部及武定威楚普安諸蠻因蛇節之亂皆以供輸煩勞爲辭乘釁起兵攻掠州縣焚燒堡砦遣也速解兒等將兵會劉國傑討之時國傑方討順元蠻不及來會也速解兒等率師分道并進次第平之

省臣奏雲南站戶貧乏詔增馬及鈔以優恤之

七年四月誅劉深罷雲南分省

史春三月劉國傑命楊贊因不花分兵先進大軍繼之賊衆戰敗大兵乘勝逐北千里破之於墨特川陣斬蛇節宋隆濟遁去尋爲其兒子宋阿重執獻餘黨悉平有司議開釁之罪劉深論死會赦議釋哈喇斯曰邀名首釁喪師辱國非常罪比不誅無以謝天下遂誅之

雲南行省參政宣武將軍段慶卒授其弟正爲大理軍民總管

晉寧建盤龍寺

野史先是有僧覺照乃段氏族人號蓮峰遊東山見滇雲歷年傳

卷五

四九

龍潭地勝咒龍遷徙次日龍去水涸遂結茅庵居之至是建寺世稱盤龍祖師

蛻按志稱師名宗照號蓮峰禪師劍川段氏子至正間遊晉寧東山景似曹溪遂建盤龍寺居之此與野史因緣年代俱不同故記之

九年命伯顏察兒董理雲南屯田事

十一年詔尊孔子爲大成至聖文宣王雲南欽奉立碑

文廟

詔曰先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王

師表萬世者也朕纘承丕緒敬仰休風循往古之良
規舉追封之盛典加號大成至聖文宣王遣使闕里
祀以太牢嗚呼父子之親君臣之義永惟聖教之尊
天地之大日月之明莫罄名言之妙尙希神化祚我
皇元此翰林閣復之辭也

蛻按成宗於是年正月崩詔頒於七月則是武宗卽
位後事也

大理軍民總管府段正招徠蒙化生爨歸化入籍

武宗至大元年六月地大震露益烏蒙尤甚

九月頒行至大銀鈔

滇雲歷年傳

卷五

五

史帝從樂實言鈔法大壞乃改造至大銀鈔一十三
等每一兩准至元鈔五貫白銀一兩黃金一錢隨路
立平準行用庫及常平倉以權物價毋令沸騰元之
鈔法至是凡三變

二月八百媳婦諸蠻亂

史八百媳婦及大小徹里諸蠻作亂詔遣雲南右丞
算只兒威往招諭之比至爲賊所賂復肆攻掠遂以

敗歸

三月梁王患風疾詔以諸王老的代鎮雲南

是年四月罷行至大銀鈔銅錢

史是年正月武宗崩仁宗嗣位以至大銀鈔輕重失宜至大大元銅錢新舊悉用行之未久爲弊滋甚詔并罷之楊朵兒只曰法有便否不當視立法之人爲廢置銅錢與褚幣相權而行古之道也何可遽廢耶言雖不用時論是之

五月復遣兵擊八百媳婦侍御史趙世延諫罷之

史陝西侍御史趙世延諫曰蠻夷事在羈縻而重煩天討先朝用兵不已致亡失軍旅誅戮省臣藉使盡得其地何補於國今窮兵黷武實傷聖治朝廷芻蕘當選重臣付以邊寄兵且勿用不聽世延再疏竟罷不

滇雲歷年傳

卷五

五

行

仁宗皇慶二年初詔行科舉雲南會試合格者五人

史初世祖時議定科舉新制未及行至是中書省臣復以爲言乃命定其條制詔天下三歲一開科蒙古色目人與漢人南人各命題蒙古色目人願試漢人南人科目中選者加二等注授

志皇慶二年詔天下以冬十月行科舉郡縣興其賢

者能者充貢二年二月會試京師合格者共三百人

蒙古色目漢人南人各七十五名蒙古內雲南一名

色目內雲南一名漢人內雲南二名

南詔野史元年十月學士李孟奏准開科雲南每榜限取五人

延祐二年立和世拉爲周王出鎮雲南未至遂逃居漢北

立烏蒙軍屯置總管萬戶府隸雲南行省

志先是雲南行省言烏蒙乃雲南咽喉之地別無屯成軍馬其地廣濶土脈膏腴皆有古昔屯田之蹟乞發畏吾兒及新附漢軍屯田鎮邊至是從之調四川軍二千人雲南軍三千人共五千人田一千二百五

頃

滇雲歷年傳 卷五

五

置雲南行省儒學提舉司

志至元六年中書省定學制頒行命諸路府官子弟入學上路二人下路一人府一人州一人餘民間子弟上路三十人下路二十五人願充生徒者與免一身雜役以譯通鑑節要頒行各路俾肄習之十九年始命雲南諸路皆建學祀先聖二十九年設雲南諸學校以蜀士充教官大德五年定生員散府二十人上中州十五人下州十人元貞元年命有司割地給

諸路蒙古學生員廩餼至是又置行省儒學提舉司三年大理總管軍民段正卒以慶之子隆爲大理總管

六年雲南省臣奏土官病故如無膺襲之人宜從其俗以妻權職詔可

史中書省臣言雲南土官病故子姪兄弟襲之無則妻承夫職遠方蠻夷頑獷難治必任土人可以集事今或闕員宜從本俗權職以行制曰可

詔還所侵順元宣撫司民地

英宗至治二年置寧遠州

三年竄諸王伊魯特木兒於雲南

史罪南坡之變與特克實逆謀也

設大理路白鹽城權稅官秩正七品中慶路權稅官秩

滇雲歷年傳

卷五

五

從七品

梁王抵洱海立保和奴二子號品甸王高祥斌弑之

南詔野史梁王旣立保和奴二子回高祥斌不服遂

弑二王且以其妃配知府楊益

泰定帝泰定元年徙雲南王王禪爲梁王

有大星隕於磻嘉縣之黑初山化爲石

詔免雲南秋糧二分

二年蒲蠻來附置順寧府

三年以馬忽思爲雲南行省平章提調烏蒙軍屯

四年洱河有水怪

南詔野史怪物如牛猪形金睛短項興水爲患時有
道者自云能除之但須得黃金百鎰爲索制之大理
總管段隆與之索成卽日移浪穹寧川湖中其患遂
息按六詔靈源記云寧川無底明宣德時有漁人李
應捕魚網得金索傍有老人曰可旋得旋斷李貪甚
欲收金索盡驚動其怪連舟俱沉至今尙作祟於寧
川云

蛻按小說家叙巫文祈事亦微類此大抵洱河曾有
水怪傳聞驚詫好異者因彷彿而書之不必果有網
索沉舟事也

滇雲歷年傳

卷五

五

致和元年秋大理總管段隆以老退閒請於朝令子俊
繼之

明宗天歷元年授段俊爲雲南行省中書平章政事

二年三月萬戶伯忽叛雲南理問仁通率官軍擊之不
克死之

傅仁通廉訪副使朶兒赤之子也

中慶鎮將敗狐叛攻威楚知事董文彥拒守城陷死之

傅文彥通海人任威楚路知事中慶鎮將敗狐叛攻

威楚官吏皆遁獨文彥嬰城固守救不至城陷賊欲

降之文彥怒罵賊不絕口賊截其耳使咬之文彥嚼

血噴賊遂遇害明年敗狐伏誅事聞賜諡莊愍官其子時中爲祿豐王簿

文宗至順元年三月雲南諸王禿堅反遣豫王阿刺忒納失里督諸將討之

史禿堅及萬戶伯忽阿禾等叛攻陷中慶路殺廉訪司官尋自稱雲南王以伯忽爲丞相阿禾等爲平章等官立城柵焚倉庫以拒命詔以乞住爲雲南平章政事帖木兒不花爲雲南左丞從阿刺忒納失里由八番進討又詔樞密帖木兒發朶甘思等處兵分道進至羅羅斯共討之

滇雲歷年傳

卷五

五

五月雲南宣慰使祿余叛附於禿堅詔遣諸王雲都思帖木兒會諸路兵進討之

史初雲南宣慰使土官祿余以討禿堅之功授行省參知政事至是叛附於禿堅羅羅諸蠻因相繼作亂平章帖木兒不花遇害詔諸王雲都思帖木兒將浙江河南江西三省兵二萬與湖廣省臣脫歡并討之置順元宣撫司麓川路軍民總管府

二年四月阿刺忒納失里等略定雲南引兵還

史阿刺忒納失里及各省兵十餘萬進擒伯忽阿禾斬之烏蒙東川諸路皆服遂復中慶路遣使獻捷言

叛者或誅或降雖已略定餘黨逃窟山谷不能必其
不反側乞分兵鎮遏之餘皆遣還詔從之

蛻披野史載權尋甸府土官曲木集義兵討雲南叛
賊伯忽於馬龍追至金馬山生擒之滇考又載段義
以蒙化知州平叛賊阿禾功陞參政然則此番大功
皆兩土官之力也各省十餘萬官兵皆口打賊耳乃
史書竟不紀曲木段義事何也又禿堅賊首或降或
死俱不之及亦可怪矣

烏撒部奏雲南驛輪甚苦願屬四川詔下參政官賈敦

熙議

滇雲歷年傳

卷五

五十六

以庚午進士支渭興充雲南行省考試官

志渭興字文舉邵陽人至順庚午進士爲雲南行省
考試官後以道梗留雲南屢進宣慰副都元帥有惠
政能文章所著詩集行於世

以楊祚爲雲南廉訪司僉事

志祚字慶之有才略所至以興學化人爲先務

雲南行中書省平章政事段俊卒族弟義繼之

野史世稱段平章實始於俊義代父職爲蒙化知州

勅授成務郎元年阿禾叛於中慶路義舉兵討平優

陞參政俊卒無子義以功繼之

九月祿余復寇雲南十月都元帥怯烈討平之

史祿余既竄伏尋出收召餘黨列行營六十所復作亂寇順元等路雲南省臣遣都事那海往招之遇害既而蒙古都元帥怯烈潛師擊破賊砦殺五百餘人禿堅之弟必刺都迷失舉家赴海死獲禿堅弟二人子三人誅之祿余遁去餘黨悉平

三年雲南郡縣大饑五月詔蠲本省田租三年

四川參政馬鎔發運雲南軍前餉中道潛回御史臺劾罷之

野史臺奏四川行省參政馬鎔發運雲南餉中道潛

滇雲歷年傳

卷五

五七

回借官銀娶妾勅下罷官

十一月雲南省臣奏兵亂闕鹽國馬傷斃詔以川鹽給之

野史省臣奏國馬每月上寅日官給鹽啖馬則馬無病因禿堅等反鹽井頽廢者多鹽益少馬多死人亦乏食詔以川鹽暫爲給濟

雲南行省參政大理總管段義卒以隆之子光繼之

順帝至元元年詔罷科舉

史初撒里帖木兒爲浙江平章會科舉驛請試官供給甚盛心頗不平及復入中書首請罷科舉及論學

盜校庄田租可給宿衛士衣糧動當國者以發其機又
欲損太廟四祭爲一於是御史呂思誠等列其罪狀
劾之不報時詔已書而未用璽參政許有壬力言於
丞相伯顏心然其言而議已定不可中輟乃溫言慰
解之明日宣詔天下科舉罷

吐蕃寇雲南大理總管段光禦之大勝

南詔野史光主大理蕃兵作亂孟州判官李生等守
白崖適高蓬賣國蕃兵遂乘勝長驅直至河尾光戰
敗之殺傷無算河赤不流得馬匹器械無數光凱旋
賦詩曰兩鎖金門百里城神州花木管絃聲齊天蒼
嶽蟠龍健勝地長河伴月明梵宇三十連碧落招提
八百向林清恒河善策心無異何患蕃夷路不平

梁王始與段氏分域構隙

滇考段光繼守大理時中原板蕩梁王以元宗室鎮
鄯闡段氏世守大理彼此嫌防始欲分域自固遂成
仇讐

二年段光遣張希矯等率兵侵鄯闡梁王擊敗之

野史段光與梁王爭地成讐乃遣張希矯楊生張連
發兵與梁王戰大敗而還存者不過數人

盜殺段光守將高蓬

滇考光將高蓬守羅那關梁王密遣人招之不從陰
賂庖人刺蓬以其首獻王王更戮庖人以自解

三年梁王兵襲大理段光禦之大勝

祿豐蝗

至正元年昆明玉案山下有赤小犬色如火群吠遍野

野史雲南玉案山生小赤犬無數群走如飛二年方

息段雄正曰此天狗星所化當有大兵壓境之兆

蛻按玉案山夷言列和蒙山今俗人呼棋盤山在省

城西北十五里

砮嘉縣雨鐵

滇雲歷年傳

卷五

羌

野史時下鐵雨破屋傷物山石亦穿

二年詔免雲南明年差稅

大理諸路請官賑恤災傷從之

四年段光死弟蒙化知州功襲

蛻按段氏歸元以來世無失德元亦優待之貴至平

章親尚宗女亦云到隆極厚無以復加者矣乃段光

却敢上抗藩王執讐用眾此盖因中原多故而憫然

有思逞之心也故削其官書以死爲不臣者戒焉

立永昌等處宣慰司

蛻按至元十三年賽典赤以改定郡縣名上於朝至

三十一年復上所定路府州縣便已前後不合茲傳
惟據年代可考及現在雲南者書之而元之紛紛建
置亦自此止矣

以張瑾爲雲南廉訪副使王旦八爲雲南行省右丞
傳瑾字君錫號玉溪河南人爲廉訪副使鋤強旌善
奸惡遠遁常行部至澂江釋禁獄五十餘起剗決冗
案三百餘件人稱頌之旦八字山堂號飛山子西夏
人爲行省右丞多善政深得軍民之心有遺愛焉
六年木邦夷斯可伐作亂

野史斯可伐叛命河南參政賈敦熙會三路兵討之
滇雲歷年傳 卷五 六

十二年始命段功襲大理總管

蛻按段光死以弟功繼立至是八年而始奉朝命以
與梁王爭構而罪之也

十五年竄右丞相脫脫於雲南哈麻遣使矯詔殺之

史脫脫再相信用汝中柏參議省事莫敢異同惟哈
麻以有德於脫脫不爲之下中柏因譖之改爲宣政
院使哈麻深銜之會脫脫督師討張士誠哈麻嗾御
史劾其出師三月略無寸功章三上詔削脫脫官爵

淮安安置旣又移置亦集乃路至是臺臣猶論其謫
輕故再徙雲南鎖西路行次大理騰衝知府高惠欲

以女事之脫脫曰吾罪人也安敢念及此巽辭拒絕
惠銜之至是再徙阿輕乞之地惠發軍圍之哈麻矯
詔遣使賜之鳩遂卒年四十二

十六年二月昆明雪深七尺人畜多斃三月兩日相盪
梁王宮中有怪

野史宮中有怪左右言盤龍寺僧蓮峰能驅邪王以
禮延之至宮行法怪遂息王喜留款及夜密問曰今
中原紛亂後事如何僧曰十年後國亡矣

里鹽井水溢損民居

野史識者知是毒龍爲害遂至晉寧延蓮峰大師驅

滇雲歷年傳

卷五

空

除之仍建寺以永鎮

寧州虎傷人居民行旅皆苦之

野史蓮峰師往寧靜坐持咒限虎遠去次日虎悉去
遠近禮謝如獲更生

七月以四川廉訪使蒲機雲爲雲南諸路廉訪使

十七年正月朔日食

十八年十二月太白經天

二十二年三月蜀寇明玉珍陷雲南梁王帖木兒不花
及官屬皆奔雲南儒學提舉馮文舉死之

志文舉四川什邡人任雲南儒學提舉明玉珍攻雲

南城將陷謂妻馬氏曰某受國恩有死而已汝光州馬中丞孫女其往依乎氏曰夫以忠死妾生何爲遂焚香北面拜并縊死於學宮

梁王奔威楚大理總管段功敗寇於關灘追至回磴關大破之復中慶路

史初明玉珍自楚入蜀據之分兵四掠以紅巾爲號旣聞陳友諒弒徐壽輝謀欲討之乃整兵守夔關不與相通復立廟以祀壽輝至是遂自稱隴蜀王遣將李芝麻帥兵由八番入仍自將三萬人合攻雲南兵至金馬山四月十日梁王出奔發中慶至石碑村王

滇雲歷年傳

卷五

五

珍兵入雲南城梁王有西行意吟詩見志曰野無青草有黃塵道側仍多戰死人觸目傷心無限事雞山還似舊時春遂奔威楚時各部乘機作亂先是梁王聞變馳書召功功謀於員外楊淵海同卜卜吉乃進兵呂閣敗紅巾於關灘江殺獲千計紅巾收合餘眾再戰殺段氏驍將鐵萬戶時有江心莊勇士楊勝堅戰死梁王自製文慟哭以祭之人皆感奮是夜紅巾屯古山寺功令人焚寺紅巾軍亂死者大半又追至回磴關大敗之紅巾大呼曰待明年來復讐賊將謝得攻安寧功擊之殺二千人謝得奔中慶是夜小軍

拾得一書乃王珍母寄來書云自爾去後平安征雲南務要得之兵少糧乏隨後發來不可輕回功令淵海倣其字跡易之曰爾去後老身不安臣下亂法又聞中國軍馬入界非止一處爾宜急回乃募能入賊營者得打金箔人陳惠願行惟母無養功曰爾母卽吾母也遂往送書王珍得書恐國中有變又新失利急收軍回功知之追至七星關大破之

梁王奏授段功爲雲南行省平章以女阿禧妻之

史紅巾旣退梁王歸鄯闡深德段功奏授平章以阿禧公主妻之時功威望大著梁王回意奉之功遂留

滇雲歷年傳

卷五

三

焉

二十三年春段功還大理未幾復至鄯闡

野史功在鄯闡夫人高氏寄之詞曰風捲殘雲九霄冉冉逐龍池無偶水紋一片綠寂寞倚屏帷春雨紛紛促蜀錦半床閒鴛鴦獨自宿珊瑚枕冷淚濕迷離目好淒涼將軍一去無過身與影立影與身獨盼歸來只恐樂極悲生冤鬼哭功得書遂辭歸至金雞廟報生子喜而作歌曰去時野火通山赤凱歌旋奏梁王懌自冬抵此又陽春時物變遷今復昔歸來芳草綠茸茸萌芽甲坼饒生意杜鵑聲裏日如年好歸矣

未幾復欲至鄯闡其臣楊智張希矯俱獻詩諫阻不聽遂復往鄯闡

梁王帖木兒不花殺雲南行中書省平章政事大理路總管軍民宣慰使世襲都元帥段功及其妻阿禡并其從官員外楊淵海

滇考功既至梁人譖於梁王曰段平章復來大有吞金馬嚙碧雞之心矣蓋早圖之梁王始疑平章密召阿禡主命之曰親莫若父母寶莫若社稷功今志不滅我不已脫無彼猶有他平章不失富貴也今付汝孔雀膽一具乘便可毒殪之禡潛然不敢受命夜寂

滇雲歷年傳

卷五

六

人定私語平章曰我父忌阿奴願與阿奴西歸因出毒具示之功曰我有功爾家我趾自蹶傷爾父尙爲我裹之爾何造言至此三諫終不聽梁王知禡不用命乃另畫計至七月中元邀功赴東寺演梵至通濟橋馬逸因命番將格殺之阿禡聞變失聲哭曰昨暝燭下纔講與阿奴雲南施宗施秀烟花殞身今日果然阿奴雖死奴不負信黃泉也欲自盡梁王防衛甚至遣使送功柩回大理安葬阿禡痛不得侍乃發哀成服作詩明志卒哀悼以死其詩多夷語然其大節凜然不可不錄也詩曰吾家住雁門深一片閒雲

到滇海心懸明月照青天不語今三載欲隨明
月到蒼山悞我一生踏裏衫吐嚕吐嚕段阿奴施宗
施秀同奴及雲片波鄰不見人押不蘆花顏色改肉
屏獨坐細思量西山鐵立霜瀟灑譯云踏裏衫錦被
也吐嚕可惜也押不蘆北地起死回生草肉屏橐駝
背也鐵立松林也功旣死死梁王愛楊淵海才欲收爲
己用淵海不屈題詩於壁曰半載功名百戰身不堪
今日總成塵死生自古皆由命禍福於今豈在人蚬
蝶夢殘滇海月杜鵑啼破點蒼春哀憐永訣雲南土
綿酒休教灑淚頻是日仰藥而卒梁王厚恤之同平

滇雲歷年傳

卷五

奎

章樞歸葬大理

二十五年大理人奉段功了實事之

夏大旱

野史是夏大旱祈禱不應梁王訪得瑜伽禪師能降
龍役鬼自定遠迎至乃設壇念咒鉢中出一小蛇遂
大雨霑足王喜酬以金帛不受役鬼荷擔而去

二十六年梁王令失刺平章七攻大理不克

鶴慶府知事楊昇請梁王與段氏議和息兵梁王從之
野史功死後梁王信讒殺段氏宗族以是稱兵不已
鶴慶知事楊昇痛梁段之失和致生民於塗炭投袂

而起請和息兵時兩國俱已厭兵遂從和議於洱河
金雞廟分界南屬梁北屬段

梁王奏授段寶爲雲南行省左丞

蜀寇明玉珍復侵雲南梁王借兵大理不許

野史紅巾寇雲南梁王遣叔鐵木的罕借兵大理段
寶不許貽書醜詆之時寶姊僧奴一名羌奴志恒不
忘復讐將適建昌阿黎氏出手刺繡文旂與寶曰我
自束髮聞母稱父冤恨我非男子不能報此旂所以
識也今歸夫家收合東兵飛檄西洱汝急應我會鄯
闡庶不共之讐可報也梁王聞之愧憾而病會蜀寇
滇雲歷年傳

卷五

五

中道自引歸竟以全安梁王亦病卒

二十七年梁王帖木兒不花薨宗室把匝刺瓦爾密自
立爲梁王改元宣光稱制封拜官屬是年復科舉以收
人心

野史是時中原多故朝命不通故把匝自立乃遂改
元稱制復開科舉仍以前考試官支渭興主試事時
渭興已爲臨安路廉訪使

蛻按把匝刺瓦爾密一稱孛羅枸匝世系無考當時

另有宗室鎮雲南把匝爲宗室無疑矣但把匝爲梁
王不知的係何年今參稽滇考野史滇略等書事跡

似在此時帖木亡把匝立也且是年元帝已北走中原全失雲南萬里安得又有朝命之及乎然則把匝之自立亦出自不得不然耳卽其改元稱制亦屬權宜應爾觀其元脈於一隅直至十六七年之久終守王號不敢稱尊及其國亡執節以死把匝亦人傑矣哉讀史者不得以連殺明使而輕訾之也

10601

溫雲歷年傳

卷五

奎

王... 宜... 文... 八... 御... 且... 皇... 天... 帝... 已... 北... 走... 中... 原... 全... 失... 雲... 南... 萬... 里... 安... 得... 又... 有... 朝... 命... 之... 及... 乎... 然... 則... 把... 匝... 之... 自... 立... 亦... 出... 自... 不... 得... 不... 然... 耳... 卽... 其... 改... 元... 稱... 制... 亦... 屬... 權... 宜... 應... 爾... 觀... 其... 元... 脈... 於... 一... 隅... 直... 至... 十... 六... 七... 年... 之... 久... 終... 守... 王... 號... 不... 敢... 稱... 尊... 及... 其... 國... 亡... 執... 節... 以... 死... 把... 匝... 亦... 人... 傑... 矣... 哉... 讀... 史... 者... 不... 得... 以... 連... 殺... 明... 使... 而... 輕... 訾... 之... 也

